

HIERONYMUS.

EUSEBIO.

EUSEBIUS.

PISCINA HEBRON, vel in urbe, vel potius in suburbano illius urbis agro sita, supra quam interfectorum Isboseth manus & pedes suspensi fuerunt, 2 Reg. iv. v. 12.

PISCINÆ HESEBON, (quæ urbs trans Jordanem fuit olim regis Sehon curia, & postea tribus Ruben primaria) videntur geminæ fuisse in ejusdem urbis portis, seu juxta eas sitæ, Cant. vii. v. 4. Opus, quantum colligi potest, visendum, & venustum, quandoquidem nihil potius habuerit sponsus, cui geminos sponsæ oculos venustos & amcenos compararet.

PISCINA INFERIOR & SUPERIOR, utraque extra muros civitatis David, montisque Sion, in quas derivabantur fontium Gion superioris & inferioris aquæ, è quibus deinde aquæ in hortos regios & vicina loca deducebantur. Dicitur autem una *superior* ratione situs loci; erat enim ad Meridiem montis Sion, altera *inferior* (quæ dicta est etiam *Natatoria Siloë*) ad Orientem, vel potius in angulo Orientis & Meridiei: erat autem ab Occidente in Orientem descensus perpetuus, sed lenis, quocirca & omnes aquæ versus Orientem decurrebant. Utriusque videtur auctor fuisse Salomon; nam & ipse Eccles. ii. v. 6. de se prædicat: *Exstruxi mihi piscinas aquarum, ut irrigarem Sylvam lignorum germinantium. Superior tamen videtur fuisse magnificentior, unde & 2 Esdræ iii. v. 16. dicitur piscina, quæ grandi opere constructa est. Hinc etiam & hæc peculiariter piscina vel aqueductus regis dicta, 2 Esdræ ii. v. 14. & à Josepho stagnum Salomonis appellatur. Aliàs etiam piscina vetus dicta est.*

PISCINA PROBATICA. Vide BETHESDA.

PISCINA SAMARIÆ, in qua canes sanguinem regis Achab occisi linxerunt, ut Elias propheta-
verat, 3 Reg. xxi. v. 38.

PISCINA SILOE. Vide SILOE, & PISCINA INFERIOR.

PISCINA SUPERIOR. Vide PISCINA INFERIOR.

PISIDIA, Asia Minoris regio, parsque Pamphyliae Ptolemæo: Straboni verò *Pisidia* major pars extrema Tauri montis tenet.

PLANITIES JERICHO. Vide CAMPESTRIA JERICHO.

PONTUS, Asiae regio, Hebraicè & apud Septuaginta Interpretes, Gen. xiv. v. 1. *Ellasar*. Sitne autem *Pontus*, cujus ibi in Scriptura fit mentio, illa regio, quæ Ponto Euxino adjacens itidem *Pontus* à Geographicis appellatur, supra modum obscurum est.

PORTÆ URBIS HIEROSOLYMITANÆ, hæc leguntur sequentes:

PORTA ANGULI, quam Adrichomius, Brochardus, Arias Montanus in angulo Orientis & Septentrionis collocant juxta turrin Hananeël: Villalpandus eam statuit in angulo Occidentis & Septentrionis, cui ego potius assentior; id enim ex Hierem. xxxi. v. 38, 39. & 2 Paral. xxv. v. 23. non male colligit.

PORTA ANTIQUA, aut VETUS dicta, constituenda videtur inter portam Ephraim, & portam piscium ad latus Boreale, ut colligitur ex 2 Esdræ iii. v. 6. & Cap. xii. v. 38. & ita censet Villalpandus. Ad Occidentem non rectè constituit Adrichomius, aliàs & porta Ephraim ad Occidentem statuenda esset, quod neque facit, neque dici ullo modo potest. Dicta autem est *vetus*, quod jam inde à Melchisedeci temporibus credatur permanisse.

PORTA AQUARUM, omnes ad Orientem collocant trans Ophel, & meritò; eum enim situm disertè ei Scriptura attribuit 2 Esdræ iii. v. 26. Sic dicta vel quod ad aquas illac exitus esse, nempe ad torrentem Cedron, fontem Rogel, piscinam Siloë, vel quod aquæ è monte Sion, aliisque vicinis ad Septentrionem montibus in vallem Tyropoeon decurrentes per hanc portam effunderentur in Torrentem Cedron. Adrichomius & Brochardus *hanc portam* cum *porta fontis* confundunt; at has esse distinguendas satis perspicuè indicat Scriptura, 2 Esdræ iii. v. 15, 26. & Cap. xii. v. 35. imò *porta aquarum* ad Orientem, *porta fontis* ad Occidentem statuenda est, ut ex iisdem locis colligitur.

PORTA BENJAMIN, quæ & ubi fuerit paulò obscurius est. Eam Brochardus à *porta Ephraim* non distinguit; Adrichomius cum *porta Anguli* confundit; Villalpandus existimat *apertam* fuisse *portam in turri Hananeël*. Sed hæc omnes conjecturæ sunt, cum nihil ad eam rem probandam solidi adferri possit: illud tamen videtur non malè colligi, si in urbis ambitu eo nomine porta statuenda est, vel in latere Septentrionali, vel in Orientali, aut in utriusque angulo statuendam esse, cum ideo Benjamin dicta fuerit, quod ad tribum Benjamin duceret. At Villalpandus duplicem portam Benjamin distinguit, unam quæ sit in ambitu urbis, de qua nunc egimus: alteram qua ex urbe superiore ad inferiorem ibatur, quæ innuitur Hierem. xx. v. 2. cum ibi dicatur fuisse *in domo Domini*, seu *juxta domum*. Ego verò crediderim hanc posteriorem sufficere, neque in ambitu urbis quærendam esse *portam Benjamin*. Neque obstat, quod ibi dicatur, in *porta Benjamin superiore*; id enim nihil aliud significat, quàm carcerem istum de quo ibi agitur, fuisse in porta, quæ altiore loco erat constituta, nempe per quam è monte Sion ad inferiorem urbem veniebat.

PORTA CUSTODIÆ, (quam eandem esse existimat Villalpandus probabiliter cum *porta judiciali*) non videtur fuisse porta in urbis ambitu, sed per quam iretur in Ophel, ubi Nathinæi concludebantur, & custodiebantur, ut rectè idem Villalpandus colligit.

PORTA EPHRAIM, (quam Adrichomius & Brochardus eandem cum *porta Benjamin* faciunt) fuit omnium sententia in latere urbis Septentrionali, nempe qua in tribum Ephraim ibatur, quæ tribus ad Septentrionem vergebat. Videtur autem, quantum colligi potest ex 2 Esdræ xii. v. 38. propior fuisse Occidentali lateri, quàm Orientali.

PORTA EQUORUM, juxta regis palatium, per quam ad torrentem Cedron educebantur equi regii ad aquatum. Fuisse autem Orientalem hanc portam ipse loci situs satis indicat, disertèque ab Hieremia asseritur Cap. xxxi. v. 40. Fuit autem ipsi Ophel Australis, aque adeo & ipsi templo ad latus versus Austrum. Fortè hæc non alia fuit à portâ aquarum, quæ & in eodem tractu videtur constituenda.